

KALATE OSU PAUL A NGA TILI

BOTE YA TÉSALÔNKA

Mebatan

(2 Tés 1 : 1,2)

1 1 Ma Paul, bia Silvanus a Timôteus, bi atili Kirké bôte ya Tésalônika, nje é ne e be Zambe Esaa a Nti Yésus Krist. Mvam é bo’o be mia a mvo’é.

Mbunane Bôte Ya Tésalônika A Eve’ela’a Jab

(Fil 1 : 3-6 ; Kol 1 : 3-8 ; 1 Tés 2 : 13, 14)

2 Bi ave Zambe akéva kom ése amu ajô denan mia bese, bi tote mia mban e meye’elane mangan été. Bi asimesan, asu Zambe Esaa wongan, mboane wônan ya mbunan, a nju’u ésaé ya nye’an, a mbane njibane ya ndinleme jenan e be Nti Yésus Krist wongan. 4 A bobejañ, Zambe a nye’e, bi ayeme ntoban a nga tobe mia, 5 amu mbamba foé wongan a nji kui e be mia a mejô étam, ve a ngule fe, a Mfufub Nsisim, a ngunlenlem abui, avale fe ane mi ayem aka’a bot bi nga too e zañe jenan amu ajô denan. 6 A ane fe mi nga bo bevu bangan, a ba be Nti, vôm mi nga nyoñe mejô mé abui nju’u ete a meva’a me Mfufub Nsisim a nga to e be mia. 7 Nalé mi nga bo éveela’a e be ba bese b’abuni e Makédônia a Akaya. 8 Amu mejô me Nti me nga mialan me so’o e be mia, sa ve mfa’a Makédônia a Akaya étam, ve mbunan mi abuni Zambe ô nga kui vôm ase; nalé ate bi nji fe yiane kobô jam éziñ été. 9 Amu na, bebien b’akañete ajô dangan, aval nkuian bi nga kui e be mia, avale fe ane mi nga kôñelan e be Zambe a li’i biyeñyeñe bi biôme na, mi saé ane vevee a nya Zambee, 10 a yange Mone wé a so’o e yôb, nnye Zambe a nga wômôlô akôlô miñwuan, Yésus ate nnye a vaa bia ayaa d’aye zu.

Esaémvolane Paul mfa’a ya Tésalônika

(M.M. 20 : 18-21, 31-35; 2 Kor 4: 1,2,5; 6: 3-10; 12 : 12-15)

2 1 Amu na, A bobejañ, miabebien mi ayema na ,njoman bi nga jome mia, ô nji bo momo jam. 2 Ve akôsabo bi nga taté tôbane njuk a ékpwe’ela’a e Filipi, aval ane mi ayem, bi nga bo ayo’o nlem e be Zambe wongan na, bi kate mia mbamba foé Zambe a abui mewosan été. 3 Amu ntebelane wongan ô nji bo wu w’aso e nkoban, nge mvin, nge a medu’an. 4 Ve avale Zambe a nga kañese bia na, mbamba foé a veban e be bia, aval ete fe bi akobô, sa ane bi aye nyemele bôt minlem, ve Zambe, nnye a yemelane minlem miangan. 5 Amu na, teke’e éyoñ éziñ bi nga belane élen nkobô aval ane mi ayem, nge biles ya bo ndo’akum, Zambe nnye a ne ngaa! 6 Nalé fe bi nji jeñe дума d’aso e be bôt, to’ona e be mia, nge e be bôte befe, akôsabo bi mbe ngule ya ka’a mia mimbe’e ane minlôman mi Krist. 7 Ve bi mbe évôvoé e zañe jenan, aval ane nyia ntoñan a kale bone bé émien. 8 Aval ane bi nga dañe nye’e mia, bi nga yene mvaé ya kab, sa ve mbamba foé Zambe étam, ve binyiñe biangan fe, amu mi nga dañe kabe bia e nlem. 9 Amu na, A

bobejañ, mi asimesan nju'u ésaé wongan a ayaé ésaé dangan, ane bi nga saé môs baa alu, ndemben bi aye bo te ka'a môt éziñ ya be mia mbe'e, éyoñ bi nga kate mia mbamba foé Zambe. 10 Miabebien mi ne bengaa, nalé fe Zambe, aka'a ntaban mfuban, a zôsôô, a teke'e bijô, bi nga too e be mia bebuni, 11 Avale fe ane mi ayeme na, bi nga tebele môt ase ya be mia, , ane ésa a bo bone bé émien 12 Bi nga bendé mia na, mi wulu ane d'ayiane e be Zambe, nnye a loene mia na, mi zu éjôé jé émien a étôto'o jé été.

13 Ajô ete nde bi ave Zambe akéva te jô'é na, éyoñ mi nga nyoñe mejô me Zambe ya mi nga wô'ô e be bia, mi nga nyoñe me, sa ke ane mejô m'aso e be bôt, ve ane mejô mebien me ne fo'o mejô me Zambe, mme m'asaé e be mia bebuni. 14 Amu na, A bobejañ, mi boya ba b'avu bekirké be Zambe be ne e be Krist e Yudéa, amu mia fe mi nga wu avale mintá da e be bobenyôñ ya ayôñ denan, aval ane fe be nga yen e be Beyude. 15 Mmbe bete be nga wôé Nti Yésus , a wôé fe bekulumejô, a titane bia, tya'a Zambe nlem, a wosane bôte bese, 16 amu be nga kame bia bi bo te kobô Biku, ane be ne nyiiban. Nalé ate be nga jalé ôve'e ya mam abé mab kom ése. Ve ayaa Zambe é nge su'ulane kui e be be.

Paul a dañe yi na, abeta ke jome kirke jab

(Yôh 16 : 1-4, 33; M.M. 17 : 14-16; Rôm 1: 9-13)

17 Nde, A bobejañ ane bi kandaneya mia nté éziñ nkandane ya mesu, sa wu ya minlem, bi nga dañe bo mban a bi beta nkômbane na, bi yene mia mesu. 18 Amu bi nga kômbô zu e be mia, ma Paul, éyoñe jia nge bibaé, ve satan a nga kame bia. 19 Amu na, jé é ne ndinleme jangan, nge meva'a mangan, nge ékat bi awumu je biabebien ? Ye sa mia, asu Nti wongan e nsoane wé. 20 Mi ne fo'o duma dangan a meva'a mangan.

3 1 Jam ete nde, éyoñ bi nga kate bo nalé, bi nga yen mvaé na, bi lí'i étam Atén, 2 a lôme Timôteus, mojañe wongan a ébe mboésaé Zambe e mbamba foé Krist été, nde ete a ye yemete mia a lebe mia e mbunane wônan été, 3 Ndemben teke'e môt a ye fô'ôban amu bitibila'a bi. Amu miabebien mi ayeme na, bi ne ngabe jangan. 4 Amu éyoñ bia be mia bi nga too, bi nga jô mia ôsusua na, bi aye tôban étibela'a, avale fe ane e nga su'ulane boban, ane mi ayem. 5 Amu ajô ete, éyoñ me mbe te ngule ya beta jibi, me nga lôme na, me yem mbunane wônan, amu woñe ya na, ndô'ôto mve'ele bôt a maneya ve'ele mia, ane nju'u ésaé wongan ô ne su'ulane bo zesé.

6 Ve éyoñe ji Timôteus a ndôme so e be mia, a kate bia mbamba mefoé ajô mbunane wônan a nye'ane wônan, a jô'ô na, mi asimesane bia mbamba nsimesan a dañe yi na, mi yene bia. 7 Amu ajô ete nde, A bobejañ, e mbia nju'u wongan a étibela'a jangan été, bi volôbaneya minlem ajô denan a mbunane wônan. 8 Amu na, éyoñe ji, bi anyiñ, nge mi tele ne sim e be Nti. 9 Amu bi ne ngule ya tu'a ve Zambe akéva ajô denan aya, amu meva'a mese bi ava'a me asu Zambe wongan amu ajô denan ? 10 Môse baa alu, bi adañe ye'elane nye na, bi yene mia mesu, bi ve mia mam m'ajembane mia e mbunane wônan .

11 Nde nyô émien a ne Zambe a Esaa wongan, a Nti Yésus wongan, a tame kôme zene jangan ya kui e be mia. 12 Nti a bo'o fe mia na, nye'ane wônan ô fôé a bulubulu bo, wua mfa'a nyô mbok, a mfa'a ya bôte bese, aval fe ane éñwongan w'abo mfa'a wônan, 13 nde ete e ne yemete minlem mienan e mfuban ntaban été, te bijô, asu Zambe a Esa wongan, éyoñ Nti wongan Yésus a ye so, ba be mimfufube mié mise.

Aval ényíñ Zambe a kañese

(1 Kor 6 : 13-20; Ef 5 : 3-8; 1 Pét 1 : 14-16; 4 : 1-5)

4 1 A bobajañ, M'asu'ulan jô na, bi aye'elan a lebe mia e be Nti Yésus na, aval ane mi nga ye'é e be bia ane mi ayiane wulu a yené mvaé e be Zambe, avale fo'ó e mi awulu di, mi ke fe ôsu a bulu bo nalé? 2 Amu mi ayem aka'a meleb bi nga ve mia amu Nti Yésus. 3 Amu wuna ô ne nkômbane Zambe, ñwô ô ne mfubane wônane na, mi tyi mejian, 4 a na, môť ase ya be mia a yiane lu'ú minga wé émien e mfuban a ésemén été, 5 sa a ayôñ nkômbane ya minyamate; Aval fe ane Biku bi ne te yeme Zambe bi abo; 6 a na, môť a bo'ó te joñôlô monyañ mfa'a ya jam ete. Amu Nti a ne nkun ya mam mete mese, avale fe ane bi nga tate tu'a kate mia. 7 Amu Zambe a nji loene bia mfa'a ya mam me ne mvin, ve e mfuban été. 8 Amu ajô été, nyô a biasé de, a ne te biasé môť, ve Zambe, nnye a ve mia Mfufub Nsissime wé.

9 Nde mfa'a ya énye'esane bobenyañ, d'ayiane ke na, môť a tili mia ; amu Zambe a ye'eleya mia na, mi nye'esan ; 10 amu jam ete mi abo mfa'a bobenyañ bese be too e Makôdénia ase. Ve, A bobajañ, bi alebe mia na, mi ke ôsu a bulu bo nalé, 11 mi ye'é tabe éjijin ntaban, môť ase a bo'ó mam mé émien, a bo'ó fe ésaé a mo mé, aval ane bi nga bendé mia, 12 nde ete mi aye wulu dulu ésemén mfa'aé ya ba be ne atan, a na, mi bo te ye'ebe e be môť.

Nsoane Nti

(1kor 15 : 19-58 ; Fil 3 : 20, 21)

13 Nde a bobajañ, bi nji kômbô mi dimi ajô ba be ne ôyo, mi za wô'ô ôlun avale fe ane ba bevok, mmbe be nji bi ndinlem. 14 Amu na, nge bi abuni na, Yésus nga wu a beta wômô, aval ete fe, amu Yésus, Zambe a ye zu ba be keya ôyo, ba be nye. 15 Amu bi ajô mia jame dina a njôane Nti na, bia bevevee, ba be lí'ya akekui nsoane Nti, bi aye ke ke ba be ne ôyo ôsu. 16 Amu Nti émien a ye sis a so'ó e yôb, a beta mvam, a tyiñe njôô beéngel, a toñe Zambe. Nalé ate miñwuan ya be Krist mi aye wômô ôsusua ; 17 mvus éte, bia bevevee, ba be lí'ya, bi aye to'éban bia be be, e minkut été, bi kele tôbane Nti e ñyem été. Nalé ate bia be Nti bi aye tabe kom ése. 18 Ajô ete, vola'ane miabebien minlem a mejô ma.

5 1 Nde , A bobajañ, mfa'a ya biyoñ a mimbu, d'ayiane ke na, môť a tili mia ajô été, 2 amu miabebien mi atu'a yeme na, môse Nti w'aye so avale fe ane ñwuwub, a aluse. 3 Eyoñ bôt b'aye jô na, Mvo'é é ne ! Woñ momo ! éyoñ été nje éndaman j'aye kui e be be atemetem, avale fe ane mie w'abi mbumbume minga, a b'aye bo teke'e éyoñ y'ake mbi. 4 Ve mia, A bobajañ, mi nji bo e dibi été, ane môs ôte w'aye dilane mia, ane ñwuwub. 5 Amu mia bese mi ne bon be éfufup a bon be môs. Bi nji bo ba ya alu, nge be ya dibi, . 6 Ajô ete, bo'ane te bômbô ôyo, aval ane ba bevo'ó b'abo, ve momba'an a bo fek. 7 Amu na, ba b'abômbô ôyo, be bôô ôyo a alu, a b'aso'ó bilam, b'aso'ó bie a alu. 8 Ve bia, amu bi ne ba ya môs, mbo'ane fek, bi be'e ébuta'a mbunan a nye'an e tôé, a afô'ôlô ndinlem ya nyian e nlô. 9 Amu Zambe a nji tobe bia na, bi tôban ayaa, ve na, bi nyoñ nyian, amu Nti Yésus Krist wongan, 10 nnye a nga wu amu ajô dangan, nde ete, j'ane bi vee, nge na bi bôô ôyo, bi aye tabe ényíñ bia be nye. 11 Jam ete nde, miabebien, wua a volô'ô nyô mbo'ó nlem, a wua a nañele'e nyô mbok, avale fe mi abo le.

Meleb a mebatan m'asu'ulan

(Rôm 12 : 17-21; Gal 6 : 1, 2; Behéb 13 : 7 ,17,)

12 Ve, A bobajañ, bi aye'elane mia na, mi yeme ba b'awu ésaé e be mia, a jôô mia e be Nti, a lebe mia, 13 a na, mi dañe semé be e nye'an été amu ajô ya ésaé jab. Taba'ane mvo'é, wua a nyô mbok. 14 Nde, A bobajañ bi aye'elane mia na, mi lebe minleles; mi volô ba be ne avevese minlem; mi su'u mintetek; jiba'ane bôt bese. 15 Fomba'ane na, mô't a bo te butane mô't mbia jam; ve tônia'sa'ane jam e ne mvaé kom ése, wua mfa'a nyô mbok, a mfa'a bese.

16 Va'ane kom ése; 17 mi ye'ela'an, te jô'é. 18 Va'an akéva mfa'a ya mam mese, amu nalé a ne nkômbane Zambe mfa'a wônan e be Krist Yésus.

19 Mi bo'o te dim Nsim. 20 Te biasane minkulane mejô, 21 ve yemela'ane mam mese. Jam e ne mvaé, biané de ne zeñ. 22 Tyian aval abé ése.

23 Nde Zambe a ne mvo'é émien a tune mia ngum, a minsisime mienane fe, a minlem mienan, a menyôle menan, bi bo'o mba'alan mingum, te bijô, éyoñ Nti wongan Yésus Krist a ye so. 24 Nyô a loene mia a ne nyô ya buni, nnye a ye fe bo de.

25 A bobajañ, ye'ela'ane ajô dangan.

26 Bata'ane bobajañe bese a mfubane nlatane anyu.

27 M'avuu mia soñ e be Nti na, kalate nyô a lañeba'an e be bobajañ bese.

28 Mvam Nti wongan Yésus Krist é tabe'e be mia.



Rev. Matthias MEYE
Secrétaire Général 1961.....